

Script of Morning Gojri News Bulletin 02 October 2024 at 1015Hrs

مارننگ گو جری نیوز بلیٹن مو رخہ 02 اکتوبر 2024

یوہ آکا شوانی جموں بے باغ علی طاہرتیں خبر سُنو۔

JK 3rd Phase Turn out

جموں کشمیر اسمبلی چناواں گا تیجا تے آخری مرحلہ مانہہ کل 69 عشاریہ 65 فیصدی پولینگ ریکارڈ کی گئی۔ 40 اسمبلی حلقاں مانہہ اس مرحلہ غے تحت ووٹ پایا گیا۔ جھپڑا پُر امن طور ور اختتام پزیر ہو گیا۔ اس راہ جموں کشمیر اسمبلی غا چناؤ واسطے 3 مرحلاں مانہہ تمام 90 حلقاں واسطے پایا گیا ووٹاں غی مجموعی فیصدی 62 عشاریہ 78 فیصد ریکارڈ کی گئی ہے۔ آخری مرحلہ مانہہ کل کرایا گیا چناؤ مانہہ سب تیں زیا دہ 76 فیصدی ووٹ ضلع اُدھم پور مانہہ پایا گیا ہیں ملی ٹینسی تیں متاثرہ جموں کشمیر غا لوکاں نے بائیکاٹ تے تشدد غی سیا ست نانہہ رد کر غے جمہو ریت مانہہ اپنو پھوسو جتایو ہے۔ پولینگ سٹیشنناں غے باہر ووٹراں گی لمی لمی قطار دیکھی گئی ہیں۔ جھپڑا بڑا صبر و تحمل نال اپنا حق رائے دیہی غا استعمال کر رہیا تھا۔ واضع رہ جے پہلا مرحلہ غے تحت گذشتہ 18 ستمبر نانہہ 61 عشاریہ 36 فیصد جد کہ دوجا مرحلہ غے تحت 25 ستمبر نانہہ ہوا چناؤ مانہہ 57 عشاریہ 31 فیصدی پولینگ ریکارڈ کی گئی تھی۔

Political Fate

جموں کشمیر یوٹی مانہہ تمام 3 مرحلاں غا چناواں غے بعد بُن امید واراں غی قسمت الیکٹرانک ووٹینگ مشیناں مانہہ بند ہو گئی ہے۔ 90 اسمبلی حلقاں گا نتیجاں غو اعلان آئندہ 8 اکتوبر نانہہ ووٹاں غی گنتی سنگ کیو جا ئیگو۔ واضع رہ جے مُلک غی تقسیم غے بعد یعنی سن 1947 تیں ہی پاکستان غی جموں کشمیر ور ماڑی نظر آرہی ہے۔ تے ان چناواں مانہہ بڑی متی تعداد مانہہ لوکاں غی طرفوں ووٹ پایا جان سنگ یوٹی مانہہ جمہوریت غی جڑ مضبوط ہوئی ہیں۔ تے لوکاں تے تشدد نانہہ ناکار دتو ہے۔ واضع رہ جے ان چناواں غی اک خاص گل یاہ وی ہے جے مغربی پاکستان غا رفیوجیاں، نالے والمیکی تے گورکھا سماج غا لوکاں نے پہلی وری جموں کشمیر غی اسمبلی غا چناواں مانہہ شرکت کی ہے۔ اواں آئندہ 8 اکتوبر نانہہ چناواں غا نتیجہ سنگ بی جے پی غی سربراہی آلی مرکزی سرکار غو وی ٹیسٹ ویگو جے دفعہ 370 غی منسوخی غا فیصلہ نانہہ واہ کس قدر جائز ٹھہران مانہہ کامیاب رہ۔

JK LG Congrats

جموں کشمیر غا لیفٹنٹ گورنر منوج سنہا نے تیجا تے آخری مرحلہ غا اسمبلی چناواں مانہہ ریکارڈ تعداد مانہہ لوکاں غی شرکت ور عوام نانہہ مبارک دتی ہے۔ اپنی اک سماجی میڈیا پوسٹ مانہہ انہاں نے کہیو جے تمام 3 مرحلاں مانہہ لوکاں غا جوش و جذبہ تیں جموں کشمیر مانہہ متحرک جمہوریت غو پتو چلے جے جمہوری اقدار مانہہ لوگ کتنو یقین رکھیں۔

Bukhari BJP

سابق وزیر تے سرنکوٹ تیں بی جے پی گانماندہ سید مشتق بخاری اج انتقال کر گیا ہیں سرکاری ذریعے نے جانکاری دیتاں وان دسیو ہے جے سید مشتاق بخاری اج سویرے اپنی رہائش گاہ پمروٹ سرنکوٹ مانہہ انتقال کر گیا۔ 75 بہراں غا اس سیاستدان مانہہ بی جے پی نے ایس ٹی واسطے مختص کیا گیا سرنکوٹ حلقہ تیں اپنو امید وار بنایو تھو۔ سرنکوٹ حلقہ تیں 2 دفعہ ایم ایل اے رہ چکا سید مشتاق بخاری نیشنل کانفرنس غا صدر ڈاکٹر فاروق عبداللہ غا کافی قریبی ساتھی وی رہ چکا ہیں۔ جنہاں نے فروری سال 2022 مانہہ پہاڑی طبقہ مانہہ شیڈیول ٹرائب غو درجو نہیں دتا جان غا معاملہ ور ناراضگی غو اظہار کرتاں وان پارٹی تیں علیحدگی اختیار کر لی تھی۔

Gandhi Shastri

قوم اج رشٹر پتا مہاتما گاندھی مانہہ ان غا 155 وان جنم تہاڑہ ور خراج عقیدت پیش کر رہی ہے۔ اس سلسلہ مانہہ ملک تے بیرون ممالک قائم بھارتی مشن مانہہ تقاریب غو انعقاد کیو جا رہیو ہے۔ اج قوم بھارت غا سابق وزیر اعظم لال بہادر شاستری مانہہ وی ان گان جنم دن ور یاد کر رہی ہے۔

Prez Message

صدر جمہوریہ درویدی مرمونے لوکاں مانہہ مہاتما گاندھی غا جنم تہاڑہ غا موقع ور سچائی، عدم تشدد، پیار تے پاکیزگی پیدہ کرن غو عہد کیا جان واسطے کہیو ہے۔ مہاتما گاندھی مانہہ ان غا جنم تہاڑہ ور خراج عقیدت پیش کرتاں وان صدر نے لوکاں ور ملک تے سماج غی ترقی واسطے لگاتار کوشش کرن غی ضرورت ور زور دتو۔

PM Tribute

وزیر اعظم نریندر مو دی نے وی مہاتما گاندھی غا جنم تہاڑا وہ ان مانہہ خراج عقیدت پیش کیو ہے۔ سماجی میڈیا ور اپنی اک پوسٹ مانہہ وزیر اعظم نے کہیو جے مہاتما گاندھی غی زندگی تے ان گان خیالات، سچائی، ہم آہنگی تے بروبری غی بنیاد ور مبنی تھو۔ جن تیں ملک لوگ ہمیشہ متاثر رہیں گان۔ وزیر اعظم نے سابق وزیر اعظم لال بہادر شاستری مانہہ وی ان گان 120 وان جنم تہاڑا ور یاد کرتاں وان خراج عقیدت پیش کیو ہے۔ ان غو کہنو تھو جے آنجہانی شاستری نے فوجی جوانان، کسانان تے ملک غی عزت بدھان غی خاطر اپنی زندگی وقف کر دتی۔

LG Gandhi

جموں کشمیر غا لیفٹنٹ گورنر منوج سنہا نے لوکاں مانہہ راشٹری پتا مہاتما گاندھی گان جنم تہاڑہ ور مبارک باد دتی ہے۔

PM Swach Bharat

وزیر اعظم نریندر مو دی گا ندھی جینتی غا موقع ور سوچھ بھارت سال 2024 پروگرام غو
اج سویرے نویں دہلی مانہہ آغاز کر رہیا ہیں۔ اس غے نال ہی سوچھ بھارت مہم شروع کیا جان
غا 10 بہرا مکمل ہو گیا ہیں۔

اس غے نال ہی خبراں غو یوہ بلیٹن ختم ہوؤ۔